

Nuúmero

Nuúmero Naajionee

Leviicujinio caneno pueya miishocoriquiano sequesano

3 ⁵Na nuhuaji Pueyasoori Moisees sequeree:

⁶“Supuetana Leviicujinio caneno pueya quia sequere niya nojori nijionura Aaroncua. Nojori quia jiyatere Aaron naacunaa nojori quiniuria. ⁷Nojori cuaara miitiuuria puetunu na miishocoriquiano Israel pueyarajanaa Pueyaso Quishaqui tacoji. Nojori naa miiniutianiyatej puetunu Israel pueyara miishocoriquianojuanaa Pueyaso Secojoua tia carijinia. ⁸Cuno pojoriiri puetunu Pueyaso Secojoua tia cooshano casaajanaa cojuariquiano mariyataa nojori miishacari puetunu Israel pueyara miishocoriquianojuanaa. Nojoriiri naa miiniutianiya puetunu Pueyaso Secojoua tiajinia miishocoriquianojuanaa. ⁹Naacuatej quiocua Leviicujinio caneno pueya jiyatere Aaronra poonijionaa nojori quiniuria, necohuarajuhuj. Quiocua naa saquiriojore Leviicujinio caneno pueya puetunu Israel pueyajinijiniojuanaa Aaronra nojori quiniuria tojetaaru-cuajanaa. ¹⁰Saniniuuja, quiocua Aaron, necohuata jiyatere pueyacuara secojona nojori quiniuria. Saniniuuja, cante juhua pueyacuara secojona

poonijionu saniniujiyani, seerataaquishoo cuno poonijosano na miiniuria, jiyano pueyano cuaara mosaaria.”

Nazareocuaca jyanishano pueya miishocoriquiano sequesano

6 ¹Na nuhuaji Pueyasoori Moisees sequeree socua:

²“Naa quia sequere Israel pueya: Caya, maajinio, nojori jaara tama na cuaqueyajaaja jiyatenu paniya saaja Pueyasora na quiniuria, naa miiniu panijia cuaara naa miiriatej: ³Nojuaja cuaara ratuuquiiria vino, tamonu jereeca ratusano casaanio. Cuaara ratuuquiiria vinagre jyanishano jernacujuhuj, vinojiniji shipinishano, tama casaajiniji shipinishano soj. Cuaara ratuuquiiria quenaaja uva caaca shocuanacu. Naajuhuj, cuaara mioyaquiiria uva jajau, sacuanijiasano uvanio. ⁴Naatej, taa juucara na sequerecuaja saaja Pueyasora na quiniuriani, naa pueyaracaanu maja na saniniu quiniutianiya casaa uva nataujiniji muetusano, maja quenaaja na jajaujiniji, maja quenaaja na shoquejinijinio. ⁵Naajuhuj, cuaara na naca tuqueteyaqiiria cuaara Pueyasora na sequesano tohuateera jaatijiaj. Tucumuejaruuri quiyajaara naatej.

Cuaara Pueyasora quiiria tojetaarucua-janaa puetunu na sequesano juucarajanaa. ⁶Pueyaracaanu saaja Pueyasora na quishacari taa na sequereecuajani cuaara catecanoyaquiiria macuucua.

⁹“Naacuatej, pueyano jaara canashi-yaquiji cusoqui na shuriucua, nojuajaari juhua curoosano quirii. Majaari tari maninia na naca quiniu Pueyasora. Naarate na camaru cuaara jeequerohuara tama na cuaqueyajaaja. Seeptimo juucajinia nojuaja cuaara tuqueteera na naca Pueyasora na quiniu na coteesacariuhua. ¹⁰Octavo juucajinia, nojuaja cuaara paara querajaa shinijia pueyacuara secojonaacua Pueyaso Secojojua tia tohuateyajinia. Jaara quiyaquiri cuno, cuaara paara querajaa jooshi niquiojua. ¹¹Pueyacuara secojonaa cuaara moora niquiriyatu na nanacata Pueyaso na jiyanootiniuria na camaru. Tamonu cuaara catijiasaaria Pueyasora. Naacuatej Pueyaso cuno pueyano jiyanootiniutianiya sesa na miiniuucuaaji cuno pueyano cusunuucua na shuriucua. Cuno juucaja cuno pueyano cuaara jiyatoohuara na naca tojetaarucujanaa saaja Pueyasora na quiniuria. ¹²Nojuaja cuaara jiyateera Pueyasora na panishano juuca, taa juuca na quiniu paniya saa Pueyasorajani. Cuaara jiyataara borreeco niquiojua Pueyasora catijiaso-coriquiano sesa na miishanojiniji na jiyanooshaanura. Coteenu saa Pueyasoraja na quiniuuri najuhua quiquianu juhua curooshojosano na quiniuucua.

¹³“Pueyano jaara tohuatere saaja Pueyasora na quiniu na sequesano, nojuaja cuaara Pueyasora na niquitiosano jiyataara Pueyaso Secojojua tia tohuateyajinia. ¹⁴Nioori na niquitiosocoriquiano Pueyasora: niquiriyatu caya borreeco tariucua niquiriyatu marijia shocoteno. Cuaara quiiria tojetaarucua-

janaa seru maniniu Pueyasora catijiaso-coriquiano. Naajuhua, cuaara niquitioora niquiriyatu maaji borreeco tariucua niquiriyatu marijia shocoteno. Cuno cuaara quiiria tojetaarucujanaa seru maniniu na nanacata jiyanooshocoriquiano na camaru. Naajuhua, cuaara niquitioora niquiriyatu caya borreeco maniniu Pueyaso niquiara na camaru shuquiriaatia miaquenura. ¹⁵Cuaara Pueyasora niquitioorajuhua canaasatu mishaja poreetajaaju majeetejosano pan. Cuno pan cuaara quiiria cashojua maniniu miniquiootasano shiyocuata. Cuaara Pueyasora niquitioora tamonu poreetesoo panniyojuhua, shiyocuata tuujusano. Cuaara niquitioorajuhua jiyasocua jajau, mashacanio. ¹⁶Pueyacuara secojonaari puetunu cuno casaajanaa masenutaniya Pueyasora na jiyatenura. Pueyacuara secojona cuaara moora na camaru seru sesa na miishanojiniji na jiyanooshaanura. Cuaara catijiaara tamonu seru Pueyasocuara. ¹⁷Naajuhua, pueyacuara secojonaari caya borreeco naatenutaniya Pueyaso niquitiosocoriquiano. Canaasatujinia poreetesoo pan niquitionutaniyajaariuhua, na natau jajauta, mashacatajuhua. ¹⁸Naacuatej, cuno pueyano Pueyaso sequequiaari nera tohuateenu seetanujanaa Pueyaso na sequesanonni, nojuaja cuaara na naca tuqueteera Secojojua tia tohuateyaji. Na tuquenu nuhuaji na naca, nojuaja cuaara na muezaca jataara manijinia tee cuniqui pueyano jiyanootiaja seru cateyacuaja Pueyaso catijiaja quiquiojiniani. ¹⁹Naa cuno pueyano tuquetenu nuhuaji na nacatej, pueyacuara secojonaari cuno pueyanoocuara mosano caya borreeco shiyora riniutianiya tariucua majeeno. Na nianutaniyari cuno pueyano juaashiquiajinia. Na juaashiquiajinia

niojonutaniyajaariuhua niquriyata poreetajaaju pan cuno canaasatujinijinio, niquriyatu panniyojua shiyocuata tuujutasanojuhuaj.
²⁰Jiyacaritij, pueyacuara secojonaari puetunu cuno casaajanaa jaasurujustenutaniya Pueyaso tacoji. Naacuatej, puetunu cuno casaajanaari jiyatesaaree tojetaarucuajanaa maninia saaja pueyacuara secojonaara, mariyataa cuno borreco jiriquia, na ruhuajacuno. Puetunu cuno casami Pueyasora niquitiosanocuajaari saaja pueyacuara secojonaa miaquesocoriquiano. Naa cuno pueyanora miishaanu nuhuajitij cuno pueyanoori na naata vino ratunu cutara.”

**Pascua juuca queranacusacarijiniji
pohuatasano**

9 ¹Niquriyatu marijia Israel pueya shocotesacari tari nojori mashiniu nuhuaji Egipto jiyajiniji, coteetaja racajinia Pueyasoori Moisees sequequiaari nojori quishacari Sinaii cariquia jiyajinia. Naa na sequereeri:

²“Israel pueya cuaara queranacuura Pascua juucara taa cua niishitiquiaari niajanियacuajani nia mashishacari Egipto jiyajiniji.”

⁵Naacuatej Israel pueyari catorce juuca serojoquiaari coteenu racajinia maninia nojori queranacunura cuno tenacari tii nojori quishacari Sinaii cariquia jiyajinia. Nojoriiri puetunu miiquiaarjianaa mariyataa taa Pueyaso tari niishitiquiaari Moiseescuajani.

**Israel pueya pacusacari
Sinaii cariquia jiyajiniji**

10 ¹⁷Na nuhuaji, Israel pueya nuhuajiria, Leviicujinio canano pueyari Pueyaso Secojojua suhuortu niyarataturee. Nojoriiri quiquiaari Gerson jiyaniishano supuetanajinijinio

scanano pueya, na tarajanu Merarijinijinio canano pueyano. Nojoriiri puetunu Pueyaso suhuortu casaajanaa patootanaa quiquiaari, na sohuacajuahuaj. Naacuatej, Pueyaso quijia patootanaari puetaquiaari nojori quijianiji.

Secaja pohuatasano

Numero 10.18-20

[Nojori nuhuaji, jiuujianraca supuetana na Jacob niqiuohuacujinio canano pueyapueeri quiojoquiaari.]

²¹Nojori nuhuajiquiaariiri supuetana Coat jiyaniishanoocujinio caneno pueya. Nojoriiri puetunu Pueyaso suhuortujiniaaco casaajanaa patootanaa quiquiaari. Nojori jaara tiuquijiotaseequia, nojoriiri Pueyaso Secojojua suhuortu riuriatatujuu tariucua nujuaretasano.

³³Puetunu Israel pueyajanaari naa quiojoquiaari Sinaii tuhuananujinijitij. Nojoriiri jiuujianaraca juuca camueenujuquiaari cuniquiji nojori pacusacari tamaquiria. Pueyaso quijia cojee patanaari Israel pueya puetanaa quiquiaari na pajenuucua tee cuniqui puetunu nojorijianaa maquenutaniyani.

³⁴Nojori quiojosacari nojori maquesaquiji, Pueyaso cohuaja najacari nojori caco tiuujia. Jaarajaaja nojoritia canujujuaari nojori quiojosacari.

Israel pueya juaashacari Pueyaso

11 ¹Tamonu juuca supuetana Israelcujinio canano pueyari Pueyaso ririjiotaturiquiaa taraatianojori miiijonuucua. Pueyaso jaara sacuaraatia nojori ririjiotanu tojiquiaari, jiyanojua juaariiri. Cunora Pueyasojiniji maniiri noojiaqueya nojorijinijinio catijiataree. Maniiri suhuortucua shocuaqueya quijiaa pueya catijiatariquiaa. ²Pueya-

pueeri Moisees nenecojonuuree na sariyocuatunuta Moisees naacunura nojori. Nocuaji Moiseesri Pueyaso maseree nojoriucua. Maniiri maquesacuhua.

³⁵Nojori quishaqui sesaari quiquiaari Kibrot-hataava. Quiniquiji Israel pueyapueeri socua quiojoquiaari Hazerat jiyaniushano jiyajiniara. Cuniqi quitiushiirihuaj.

Cariiquia jiyajinia Israel pueya pacujusacari tamaquiria

12 ¹⁶Na nuhuaji, pueyapueeri Hazerotjiniji quiaareecuhua. Tamaqui cariiquia jiyajinia quitiushiiri, nojori jiyaniquitiusano Paran jiyajinia.

Moisees jiyaramiquishacari manujunuucua

13 ¹Pueyasoori naa Moisees sequereeqij:

²—Moiseesnaa, puetunu Israel pueyaranojanaa cua niquitosocoriquiano Canaan jiya manujunuucua pueya quia jiyaramiquiri. Cuno quia jiyaramiquishocoriquiano pueya cuaara quiiria niquiriyatu pueyano puetunu cuno doce Israel niquiohuacuajinio caneno pueyajinijiniojuanaa. Cuno pojori cuaara quiiria saa tojishano pueyaja.

³Moiseesri Pueyaso sequesano miiquiaari taa Pueyaso sequequiaari nojuacuajani. Naacuatej, Moiseesri na saquiriojosano pueya jiyaramiquiquiaari Paran cariiquia jiyajiniji. Puetunu nojorijianaari tojishano rerequetesoo pueya quiriqiase narta Israel pueyajinijinio. ¹⁷Moiseesri nojori jiyaramiquiquiaari Canaan jiya manujunuucua. Jiyacari naa cuno pojori sequereeri:

—Cariiquia Neeguev jiyaaco nia quiaare, niocua socua tuhuananuhuacua tacatama. ¹⁸Niocua maninia niquinijionuure cuno jiya taamuecateja-

nojoni. Niocua tii quijiaca pueya niquirijuhua, ¿nujuatajatejanojoni, miaquejosaatajajacua soj? Niocua na niquirijuhua, ¿queraraqitii, secaja soj? ¹⁹Niocua nojori quijia niquirijuhua.

¿Taamuecajianiaaco quijiaca pueyajatejanojoni, nareja suhuortucujaniaaco quijiaca pueyatee? ¿Nojori tiaca shocuatee saijiniji sohuacacaraca, maja soj? Niocua nojori quijia jiya niquirijuhua, ¿seetanujuaana natojojuara jiya maniniutii, maja soj? ²⁰Naajuhua, niocua cuno jiya niquiri, ¿nacuhuanacatee maja soj? Majaari najuhua puerenu. Niocua cuno jiyajiniji naana jajau nitiootaarohua canaaraaja canaa niquishocoriquiano.

Cunoori quiriquiaa uva jiyapuera carajotasacari.

²⁵Cuno pojoriiri cuarenta juuca shocotejoquiaari jiya manujunuucua nojori quishacari. ²⁶Na nuhuaji Cades jiyaniushanojiniara riujiutuiaquiaarihuari cariiquia Paran jiyajinia. Tii nojoriicuaaji quitiriuiquiaari Moisees, Aaroon, puetunu Israel pueyajanaano. Nojoriiri jiyacari pohuataree puetunu nojori niquishanojanaa. Nojori tiuquitiasanohua naana jajau narta pueya niquitituriiaarihuaj. ²⁷Nojoriiri jiyacari naa Moisees sequeturee:

—Canaa tari quiuiocuaa noo jiya manujunuucua, teyanocua canaa quia jiyaramiquiquianucuaajani. Cuno jiyari seetanujuaana jiya maniniu. Miasanoori queraatia quiaa cuno jiyajinia. Nataacuacaari maninia nujuaa tiijihuaj. Nia niquishurij, nioori tijinio naana jajau. ²⁸Tii camaruhuari miaquetojonu niishijiajuhuaj, jiyanojua puereetuca tiacaracaari saa na tiaca shocua matakacaracaja. Canaari jiyaconaja Anaccuajinio caneno pueya niquiriucuaajanihuaj. ²⁹Naajuhua, cariiquia Neeguev jiya jamatuni, cunoori

Amalecita taucuaca jiya.

Tuhuananuhuaraca jiya saniniunijia, cunoori Hitita, Jebuseocuaca, Amorreoacuaca jiya saniniuujia. Shoniniacu caminia shuriquico saniniuujia, Jordaan moo shuriquicojuhuaj, puetunu cuno jiyajanaari Cananeocuaca jiya.

³⁰Calebri jiyacari Moiseses tacoji maano narta pueya sanaajaree. Naa nojori sequeereeri:

—iTuma na cohuanashitiaj! Cuno jiyacuajaari puerano. Coteenu na camaruhua pa miaquejore tiji. Pa naatacuaja nojori miaquejonu.

³¹Manujunuucua nata quiojono narta pueyari saniniuujia naa na riucatureecujua:

—Maja, maja pa naata cuno taucuaca miaquejonu. Nojoriiri socua cumueeca pajaniyajiniji.

³²Nojorijianaa niquiniuucua manujunuucua nojori quishacari, nojoricuajaari naacua maninia niishiriquiaa puetunu nojori niquishanojanaari seetanujuanaa quiriqiaa. Naajaa naa narta Israel pueya sequetujuaari:

—Cuno jiya canaa na manujucoocuaani, cuno jiyari tama tii quijiaca na pueyajaaja puecoojua. Puetunu cuno jiyajinia quijiaca canaa niquishano taucuacajanaari jiyanojua jiyaconaja taucuaca. ³³Canaari jiyaconaja pueya niquiriucuaajaniuhuaj. Nojoricuajaari tariucuaaanu Anac niquiohuacujainio caneno taucuaca. Naacuatej, nojori tajinia canaa quishacari, canaari juhua muerucuntuniyojua quiquianuni. Canaari seetanujuanaa naa quiquianu nojoririani.

Israel pueya ruuretasacari Camarnujuanaa

14 ¹Naacuatej, puetunu Israel pueyajanaari sapueee. Puetunu cuno niucujanaa sariyocatureejaariuhuaj. Nujuquenuucua juhuaquatureeri. ²Jiyacari-

tij, puetunu cuno pueyajanaari sacuraatia riushujiutiaturee Moiseses, Aaronjaajanio. Nojoriiri naa pocooreequij: “Casaama tari pa cusojuanuucanunij, Egipto jiyajiniaja pa quishacarija, cariquia jiyacumaji pa nishacari maaraja. ³¿Casaacua Pueyaso puetacanu pajaniya nio jiyajiniajaarani pa paraa na miaquejotenura pajaniya, pa niquiocihua pa niquiohuataja quioosaanura seyara, naatejaaratej? ¡Egipto jiyajinia pa riuijuurihua juhuari!”

⁴Tama nojorijiaarija jiyacari naa sequetooreequij: “Niquiriyatu pajaniya-jinijinio pa camarnurano pa jiyaterej. Nojuajacua Egiptojiniohuara pa riuijuutiarohua.”

⁵Puetunu tii narta pueya niquiarajani, Moisesesri tarajanu Aaronta jiyocuara jacamaturee narta pueya nojori pueretunuucua. Na jiniji rupueteturee jiyocuaari. ⁶Josuee, Caleb saniniuujia, teyonu pojoritiucuaa jiya manujunuucua quiojoquiaarini, nojoriiri jiyanojua na taraajenuta tama nojori cushiquiya toquejaaja sureeree. Naa na toque sureetureeri, sacuraatia narta pueya rimiaaquenu nojori tojinuuucua. ⁷Naacuatej, nojoriiri naa sequeturee puetunu narta Israel pueyajanaatej:

—¿Casa nia taacanutaajaaranij?

Noo jiya canaa na manujunuucua quiacanutej, cuno jiyari tojetaarucuaajanaa jiya maniniu. ⁸Pueyaso jaara pa naacure cuno jiyajiniji pa miaquejonura pa paraa, jaara pa naacure cuno jiyajinia pa tiuquitianurajuhuaj, Pueyasojuanaari socua pa jiyarano pa niquitionutaniyaquinioj. Cuno jiyacuajaari tojetaarucuaajanaa jiya maniniu. Puetunu miasanojanaari tii morijia maninia. ⁹¿Pueyanaa, casaara Pueyaso nia ruuretaajaarani? Majaari cuno jiyajinia quijiaca taucuaca pueretunujuhuaj. Tuma quiriqiano na jiyaninioj. Pajaniyajanaacuajaari nojori

puecariquianoni. Cuno taucuacaari cojuanaaju, nocuaji tacunaajujaarihuaj. Pajaniya cutaraari pa naacuriquiano pa Pueyaso jitiaani. iNaacuatej, maja puereconu!

¹⁰Tojiyashijiaca narta pueya quiniucua, nojoriiri saaja saitia jacunu panirii Josuee, Calebjaajanio. Jiyacaritij, Pueyaso shacantuca cumaacaari Pueyaso secojojua suhuortujinia niquishaaree. Puetunu Israel pueyaja-naari na niquiquiaari. ¹¹Pueyasoori jiyacari naa Moisees sequereequij:

—¿Taacari nio pueya tarinitianutaniya naa sacuaraatia na samiritiatunu janiyarinij? ¿Taacari na tarnitiatunutaniya cucuaji na taacanuuunurinij? Janiyaquiiri najuhuaa cua cumaacata nocuaji jiuujiate-sano casaa miiijono nojoririani.

¹²Naacuatej, janiyari nojoriicua jiyaronutaniya pacunujujua cusununi. Cuaara cuno cusonu puequetatuura maja nojori tiuquitianura nojoririano cua niquitionu panishano jiyajinia, na camaruhua nojori quiniuria. Quiocuajinio caneno pueya saniniujia Moiseesna, janiya cutaraari nojori canijiariquiano jiyanoahuani. Nojori cutaraari socua nio pueyajiniji cumaacaraca quiriquiano, na paraa miaquejojuaca cutarajuhua.

¹³Moiseesri jiyacari saaja naa Pueyaso riucaaree:

—Tama quiajanijacujajaruahuete nio pueya jaatiano quia cumaacata Egipto jiyajinijiti. Quiarijia saniniujia, Egiptojinia quijiaa taucuaca jaara nio niishiri taa quiarijia nio pueya quia puecoonu paniyacuajani, nojoriiri quia rerequeteriquiano. ¹⁴Nojoricua Canaan jiyajinia quijia taucuaca caminiujiuri quia pueya quia puecoonujiniji. Canaa paraa taucucacuajaari tari niishiya quiajanijajanaa canaa Pueyasoniqui, quiajanijajanaacuajaari nio quia pueya cojiyacuja. Cuno taucuacaari niishiyaju-

huaj, quiaanaari pueyano jiriquioquiaa catecaji quia pocoojonura nata. Cuno taucuacaari niishiyajuhua, quiaari pueyara-caanu canaa caco tiuquibia juhua cohuaja najacaja. Nojoriiri niishiyajuhua, juuca canaa quia puetasacari quiaari cohuaja najacara jataquiaa. Niucua saniniujia, quiaari maniria jataquiaa canaa quia cuhuatanura. ¹⁵Naacuatej Pueyasonaa, quiaa jaara quiarijia pueture puecoonu nio quia pueyaniqui, tamonu jiyacajinia quijiaa taucuaca, quia cumaacata quia miiijosanojiniji niishijiaaari naa sequeturiquianotej: ¹⁶“Pueyasoqui maja na naata tiuquinitianu quiquianu na pueya Canaan jiyajinia, seetanujuanaa na sequesano cuno na pueya na niquitiosocoriquianotej. Naacua niya nio cariquia jiyajinia nojori puecoorucuaari.”

¹⁷Naacuatej Pueyasonaa, quiarijia quia cumaaca quia pueya quia niquitiri. Quiaacuajaari naa canaa sequenotej.

¹⁸Tama quiajanijacujajari canaa sequeno, quiaari ritia juayaquijia. Quia paniniuuri pueetaaquijia. Quiaari puetunu sesa miiniujianaa jiyanoojia, quia ruutetajacajuhua. Quiaari sesa miiija saniitioriquiano cutara. Quiaari pueya miiijosano sacuaraatia tiutiariquiano nio pojoriicua: necohuacua, na jiuhueacua, na jiuhuea niquiohuacua, na jiuhuea jiuhueacuajaajanio. ¹⁹Quia paniniucujajari tojetaarucujajanaa puequeyaquijia. Naacuatej Pueyasonaa, sacuaraatia nio quia pueya miishano quia jiyanoori. Egipto jiyajiniji canaa quia jaatianujiniji, quiaacuajaari tari pueyaracaanu canaa rejeretarucuaa cariquia jiyacumaji canaa nishacari niyara.

Pueyaso saniitiosacari na Israel pueya

²⁰Pueyasoori naa Moisees riucaaree:
—Maniniacuaja, janiyari puetunu nojorijianaa jiyanooniutianiyani taa

nojoriicuara quia maseree janiyacujani.
²¹Saniniuujia, nio nia niishiri cutara: seetanujuaana quijiajuhuanaja cua quiniuucua, naajuhuaaj, shacantuuca cua cumaaca quiniuucua puetunu jiyajinia-janaa, majaari cua sapojonu.

²²Naacuatej, noo pojori, Egipto jiyajinia cua cumaacata cua miijosano niquitiuniotej, cariquia jiyajiniajuhuajj, noo pojorijuhuaaj cariquia jiyacumaji pa nishacari cua pacutejotiquiaari nojoriicuara cua najiquititiuniotej, noo pojorijuhuaaj nojoriria cua sequesano samiritiatuno saajatej, ²³puetunu nojorijianaari nojoririano cua niquitiosocoriquiano jiya niquitiyaquiriquiano. Janiyacuajaari tariucuaaanu nia supuetanaa sequenoni, cuno jiyacuajaari niaarano cua niquitiosocoriquiano cua sequesano. Naacuatej, puetunu cua ruuretajacajanaari maja quenaaja na niquitiuniu quiniutianiya cuno jiya.

²⁹Naacuatej, noo pueya, teyonu pojoritiucuaa tariucua veinte marijia shocotejonuni, nojori sesacacujaari tariucua nequesoreetujinia naajiotasano quiya. Puetunu cuno pojorijianaacuajaari sacuaraatia rimiaaquecono cucuara. Puetunu nojorijianaari cariquia jiyajiniaja nojori camarucuneetasacari cusunuriquiano. Nojoriiri na moquecoriquiano cariquia jiyajiniatej. Naacuatej, noo pojori na sesaca tari naajiotasaaquiaari nequesoreetujiniatej, puetunu nojorijianaari cusunuriquiano sacuaraatia nojori rimiaaquenuucua cucuara. Nojoriiri na jamojosaariquiano tiquiyocua nio cariquia jiyajinia. ³⁰Caleb cutaraari Josueeta cuno jiyajinia tiuquitiariquiano. Niajaniya saniniuujia cua riushujiutianuujuacanaa, janiyari nia niquitionu paninio juucua cuno jiyani, na camaruhua nia quiniuria. Saniniuujia, niquiriyatu niajaniyajiniji-

nioori maja quenaaja cuno jiyajinia tiuquiriquiano. ³⁵Janiyajanaacuajaari Pueyasoni, janiyari naacua seetanujuaana sequeyaquij: Janiyari quiarijia naa nia miniutianiyani cua tojtiaashijiaca pueyanaa. Niaari cucuara coquetoorucuaa mariyataa jatiqui nia ruuretatunura janiya. Naacuatej, niojuanaari nia quiniu. Niaari nio cariquia jiyajiniaja puequeriquiano.

Na paraa shocotasacari Israel pueya

³⁹Moisees jaara naa Pueyaso sequesano caminiujuquiaari narta Israel pueyaratej, puetunu cuno pueyajanaari jijanohua taraajecoquiaari. ⁴⁰Jaara juhuaquequiaari, puetunu Israel pueyajanaari tariquicuaji sanetaquiaari. Nojoriiri jiyaconaja tuhuananuhucua tacataquiaari. Jiyacari naa sequetureeri: —iPaacuaja tari niya quiyani!

Pueyaso niquitiosocoriquiano jiyajinia pa tiuquitiarej. Paa juhuari sesa miiriucaeacuaranij.

⁴¹Moiseesri juucua naa tari narta pueya sequeree juucuatej:

—¿Casaara Pueyaso sequesano nia tojiyaquiyajaanij? Naa nia miiniu paniniuniquitij, cunoori maja maninia.

⁴²Maja najuhuaana cuno jiyajinia nia tiuquitianura shiiniuquiniyu, pueyanaa. Pueyaso maja tari na cojinu niajaniya. ¡Niaa cocuaatia miyacujua! Nia paraacua nia shoori miaquejonu saniya.

⁴⁴Rejetejaca nojori quiniuucua, nojoriiri saaja cuno jiyaconaja tuhuana-nuhua quiajaacua tacataquiaari. Saniniuujia, Pueyaso quijia cojee cutaraari maja tari pootiosaariquiano quiriquiaa na cajitiasaquiji. Moiseesri nojori quishaquiji poyaquiriquiano quiriquiaajuhuaaj. ⁴⁵Jiyacaritij, cuno jiyajinijinio camaruhua taucuaa Amalecitani, Cananeocuacanio, nojoriiri Israel pueyacia sanetaquiaari nojori na

miaquejonura. Cuno taucuacaari Israel pueya neteyotatuquiaari. Jiyacari Israel pueya miaquejotureeri. Hormaa jiyanishano tiacajinia nojori jatatuqueeri.

**Coree ruuretasacari
Moisees Aaronnio**

16 ¹Jiyacari supuetana Levii niquiohuacuajinio pueyano quijiaari Coree, Coat niquiohuacuajinio pueyano. Nojuajaari Izhar niyanu quiriquire. Socua quiriquireaariuhuaq jiuujianraca canuu. Caapiqui nojorijini-jinioori quiriquirea Eliab niquiohua, supuetana Rubeen niquiohuacuajinio pueya. Nioori nojori sesaca: Datan, Abiramnio. Quiriquireaariuhuaq On jiyanishano Pelet niyanu. ²Cuno pojoriiri Moiseescuara tonujutooquiaari, maja socua camarnu Moisees Aaron quiniuria. Socua nojori cojiquiaariiri dosciento cincuenta narta Israel pueya. Cuno pueyari narta pueya tojishano pueya quijia; narta pueya nacasunaajuhuaq. Nojoriiri naacua niishishano pueya quiquiaari. ³Puetunu cuno pojorijianaari rerejoquiaari Moiseesta, Aaroonta nojori juayonuutana. Naacuatej, nojoriiri naa Moisees Aaron sequetuquiaari:

—Maja socua canaa cushutiojonu. Pueyasocuaajaari tari puetunu pajaniyanaa jiyateno juhua sesa miyaquijiacara pa quiniuria na niquiara. Pueyasocuaajaari niya quiya puetunu pajaniyatajanaa. ¿Casaara Pueyaso saquiriojosano pueya camarucua na jiyatecanu tama nia cuaqueyajaajani, nia cumaaca nia tojitionura puetunu canaajanaani?

⁸Moiseesri jiyacari naa Coree sequereequij:

—Quiarijia cua tojitiuri, supuetana Leviacuajinio caneno pueyanaa:

⁹¿Niaatee nia poonijosano samiritiaa, naajaa puetunu parta Israel pueyajinijio Pueyaso saquiriojosano nia quiniucua cuno poonijosano nia miiniuria, catecaji na shuriucua nia quiniuria na secojojua tijaniani? ¿Majateeri nia maniniucuanujuhuaq Pueyaso secojojua-jinia nia poonijionura naa nia naacunura niarta pueyatej? ¹⁰Pueyasojuanaacua-jaari naa nia panitiano cuno poonijosano mijiaa nia quiniuriatej, Leviacuajinio caneno pueyanaa, catecaji nia quiniuria na shuriucua pueyaracaanu nera nia cojesacari na quijia suhuortu cari. ¿Niaateeri seetanujanaa pueyacuara secojonaa camarucua quiniu panijuhuaq? ¹¹Coreenaa, quiartucuaanaajaajanio, maninia nio nia niishiri cutara, pueyanaa. Naa sacuaratia nia rimiaaquenuucua Aaroncuaratej, tama nijaniyajaarijia Pueyasoocuara quejaree juaaniu.

¹⁹Tariquia saniniuujia, Moiseesta na juayonuutanura socuani, Coreeri tariucua puetunu narta pueyajanaa rerejoteno quiriquirea Pueyaso secojojua suhuortu tacoji. Jiyacaritij, Pueyaso shacantuuca cumaacaari canashiyaquiji nojoriicua muetaquiaari. Puetunu pueyajanaari na niquirii. ²⁰Pueyasoori naa sequeree Moiseestej, Aaronjaajanio:

²⁴—Puetunu Israel pueyajanaa nia numootejore nojori cuaara netecatuatura cuno suhuortujiniji tee Coree, Datan Abiram quiyacuajani.

²⁷Puetunu pueyajanaari ritia shiriquirii cuno suhuortujiniji tee Coree, Datan, Abiram quiriquireacuajani. Puetunu cuno pojorijianaari jiyacari juhuajaniya na suhuortucua nacaacuma nujuaturiquiaa necocohuataja, necohuatajaajanio. ²⁸Maatia narta pueya niishiniuria, Moiseesri naa sequeree puetunu pueyajanaatej:

—Quiarijia niocua niishiri Pueyaso-juanaacuaajaari puetunu nio cua miiijosanojanaa cua seeratano. Majaari janiya tama cua panishanojaaja miijiyoni. ²⁹Naacuatej, nio sesa miijiaca pueya jaara tama na saaquianoshishacarijiaaja shaajeconu taa puetunu pueyajanaa shaajecoquiaa-cuaani, niocua naacua niishiri maja seetanujuanaa Pueyaso cua seeratano niajaninya. ³⁰Saniniuuja, Pueyaso jaara na cumaacata nocuaji jiuujiatesano casaa miiri quiarijia, jiya jaara canashi-yaquiji jiaquequee jiaquesaaquiji, cuno sesa miijiaca pueya jaara jiya jiaqueyama totere saminiucua puetunu nojori jiitiasano casamitiajanaa, naa jiya mianuucua nojoritij, niaari naacua niishiniutianiya cutaratej cuno sesa miijiaca pueyaquiri seetanujuanaa Pueyaso samiritiarucuaa.

³¹Naa Moisees tucatasacari sequenu-tej, jiyari cuno sesa miijiaca pueya suhuortucua cariquimiaji jiaquequee.

³²Jiyari naa miaquiaari puetunu cuno canuujuanaatej, teyano pojoritiucuaja Coree cojitiuquiaari jaarajaaja timia Moisees juaaniuni, puetunu nojori niquiocoahuatajanaa, puetunu necohua-juhuaj, puetunu nojori jiitiasano casamijiaajanio. ³³Cuno pueyari saminiucuaja jiya jiaqueya puequeetujinia totequiaari puetunu nojori jiitiasano casamitijanaa. Na nuhuaji, jiyari juhua juhuanoraja mishiquiiaariuhua nojori nuhuaji. Cuno pojoriiri naa shaajasaquiaari narta Israel pueya tajinijitij. Sanaajequeeri. ³⁴Cuno pojori suhuortucua shocua quijiaca tojishacari jiya jiaqueyama toteyano sariyocuatunutej, narta pueyari ritia netecuatuee naa na sequenuta:

—iRitia nia netecuatuee! Jiyaniquijia pa miareejaniuhua taa nia niquiyacuajanij.

³⁵Jiyacarijuhuaj, Pueyasoori mani tinirii noo 250 pueya puecoonura teyonu pojoritiucuaja shanohua jaanuta-ja catijiatuquiquiaa Pueyasora juhua pueyacuara secojonaajani.

⁴¹Naa Pueyaso miiniu nuhuaji, cuno tariqui saniniuuja, puetunu cuno Israel pueyajanaari naa juaatiuquiaari Moiseestej, tarajanu Aaroonjaajanio:

—¿Casaara naa nia miiricuani? iNiaa Pueyaso saquiriojosano pueya puecooreecujua!

⁴²Puetunu cuno pueyajanaari Moisees, Aaroon shocua camarucutariquiaa. Moiseesri jiyacari tarajanu Aaroonta Pueyaso secojojua suhuortujinia quiaquee. Tari tii nojori quishacari, cohuaja najacaari suhuortuucua cajiquiaari. Pueyaso shacantuua cumaacaari jiyacari niquishaaree.

⁴³Moiseesri jiyacari tarajanu Aaroonta Pueyaso secojojua suhuortu tajoji nujuatuquiaari. ⁴⁴Pueyasoori jiyacari naa Moisees sequeerequij:

⁴⁵—iNio pueya shuriucuaaji ritia niiquiji nia shiriquiri! Janiyari quiarijiaja nojori puecoonutaniya ritiani.

Moiseesri tarajanu Aaroonta jiyocuara jacamaturee narta pueyacuara Pueyaso na masetunura, maja Pueyaso puecoonura nojori. ⁴⁶Moiseesri Aaroon seuree:

—Miji quia riri quia shanohua jaanujua casaa quia catijiaja. Quiocua juhuacutujiniji naata catiyanu nishiya niojore tii. Quiocua tii jatarohua cuno shanohua jaanujua joocua. Naa quia miiniu nuhuajitij, quiocua ritia quiaare pueyacua tee nojori quiyacuajani. Quiocua Pueyaso masere nojoriicuara Pueyaso jiyanooniuria nojori. Pueyacuajaari tama nojoriicuarajaaja Pueyaso najiquitirii. ¿Taa quiarijia Pueyaso pa shiniajaacuaanij? Pueyasocuaajari

nojoriicua jiyaroree ritia pacujua cusonu. Pueyari naacua tari coteeree cusonuunutej.

⁴⁷Aaronri naa miiriquij taa Moisees sequeree nojuacuajani. Ritia netequée pueyacuari tee cuniqui nojori mariquíaa jatiquicuajani. Pueyaso jiyarosano ritia pacujua cusonuni, queraatia pueyari jiyacari tari na cusonuutariquiaacuaa. Aaronri shanhua jaanujua casaa niojoquiaari cateriquiano. Jiyacari Pueyaso maseree na jiyanooniuria puetunu sesa Israel pueya miishanoocuarajanaari.

⁴⁸Queraatia pueyari tariucua macunucua pojocoriquiaacuaa. Tamasacari saminiucuaa nujuaturiquiaacujua. Aaronri ritia nojori tajiniocoma nujuaree shanhua jaanujua casaata. Nojori cusojuaniuyano cusonuuri jiyacari pueyajequee. ⁴⁹Cuno juucani, catorce mil seteciento pueyari cusonuucuaari. Majaari noo pueya serojosaanu cutara, jiya nojori cojiritiaquiaari mianu Coreetajatej. ⁵⁰Naa pueya cusojuaniuyano cusonu pueyajesacaritij, Aaronri Pueyaso secojojua suhuortujinia riujuuquiaariuhua Moisees na coquenuhuara tii.

Aaron natacaari catuutiaquiaari

17 ¹Pueyasoori Moisees sequeree: ²—Quiria quiarijia quia numootejore puetunu doce Israelcuajinio caneno pueyajanaa. Puetunu nojorijiniujinio doce jiyaniijianucujanaa cuaara na nataca niquitiojooa quajaniya. Naa doce canuucujajinio caneno nojori quiniuucuatej, nojori nataa cuaara quiiria docejuhuaj. Naacuatej Moiseesnaa, quiocua na camaruhua sesaca naajiore nojori nataacua. ³Naajuhua, quiocua supuetana Leviicujajinio caneno pueya niquitiosano natacaacua naajiore

Aaron sesa. Naacuatej, cuaara quiiria niquiriyatu nataca saa nojori supuetanaacuajinio jiyaniijianucua niquitiojosanojua. ⁴Quiocua cuno nataa niojoree cua secojojua suhuortujiniaaco cua cojee cajitiaja taccoji tee cuniqui niaacua cua muetaquiaacuajani. ⁵Janiyajanaari cua saquirojosano pueyano nataca catuutianiniutianiya. Pueyari jiyacari niishiniutianiya canteja cua saquirojosanonni saa quiriaja poonijiona quiriquiano. Cunoori Israel pueya niishiniuria maninia maja socua sacuaraatia nojori rimiaaquenura niaacuara cua niquiara.

⁶Moiseesri naa Pueyaso sequesano caminiujuquiaari Israel pueyara. Naacuatej, puetunu Israel doce maanu jiyaniijianucujanaari na nataca niquitiojoturee. Moiseesri naacua doce nataa reratereequij. Aaron natacaari tii quiriquiaajuhua, narta nataa tajiniani. ⁷Moiseesri na reratesano nataa niojoquiaari Pueyaso quijia cojee cajitiaja taccoji na secojojua suhuortujinia. ⁸Moisees jaara tariqui quiaquiaari Pueyaso secojojua suhuortujinia, Aaron nataca riuriatasee catuutianoori. Cuno natacari supuetana Leviicujajinio caneno pueya maanu jiyaniijia niquitiosano nataca quiriquiaacua. Shuucucaracaari quiriquiaa; tariucua noshuriujia jaaracajaajanio. ⁹Moiseesri jiyacari puetunu cuno nataajanaa pooquiaariuhua Pueyaso quishaqui sohuacajiniji. Puetunu narta Israel pueyajanaa na niquitiojioquiaari. Cuno nataa nojori shootianu nuhuaji, tama na camarujaarijia tama na natacajaa riquiaari.

¹⁰Pueyasoori jiyacari naa Moisees sequeree:

—Cua quijia cojee taccoji Aaron nataca quia niarohua. Cuaara tii

racateera, cua tojitiaashijia pueya niishiniuria janiyari naa miijiani. Naa quia miiritij, maja socua sacuaraatia nojori rimiaaquenura cua niquiara, janiya mariqui nojori puecoorejaariuhua.

¹¹Moiseesri naa miiquiaari taa

Pueyaso sequequiaari nojuacuajani.

¹²Israel pueyari saaja naa sequetuquiaa-ri Moiseestej:

—i'Taa quiarijia canaa miyacuani!
iPuetunu canaajanaari cusuunuriquiano-ni! ¹³Naacuatej canaputeja Pueyaso quishaqui na suhuortujinia catecano-quiaani, nojoriiri cusuunuquiaa.
¿Maniniateeri canaa jaara naa puetunu-juanaa cusuunutanianiyani?

Mohuaca pacaretasacari saajiajiniji

20 ¹Marijia coteja racajiniani, puetunu supuetana Israelcuajinio caneno pueyajanaari cuno racajinia tiuquiiijioquiaari Cades jiyaniashano jiyajinia Zin jiyaniashano cariiquia jiyajinia. Israel pueyari tii jiyojetaquiaari rupaquijia. Moisees, Aaron rimiatu Mariari tii shaajeseequiaari. Tijia jamosaquiaariiri.

²Nojori quishaqui nojori jiitiaaquiniucua mohuaca na ratusocoriquiano, puetunu nojorijianaari coquetoquiaari Moisees, Aaron nojori riushujiutianura.

³Nojoriiri jiyacari naa sequeturee Moiseestej:

—Casaamaara canaa cusojuanuucanu parta Israel pueyatajuhuaj Pueyaso jaara nojori cusojuanuucanucuatej.

⁴¿Casaacua nio cariiquia jiyajiniara nia puetaarucuaa Pueyaso saquiriojosano pueyacuani? ¿Niaatee canaa cusojuanuunu panijayuhuanaja puetunu canaa juyacatajanaa soj? ⁵¿Casaara Egipto jiyajiniji nia mashiquiquianu canaajaarani nio sacuaraatiucua jiyasequejinia nia jiitianura canaani?

Naacuatej, majaari canaa naata casaa natanu quenaaja canaa miasocoriquiano. Majaari niya higuera quiniu. Shaaquiiri uva cuhuariquiac. Majaari mininia quiniu. Majaari quenaaja ratusocoriquiano mohuaca quiniujuhuaj.

⁶Jiyacaritij, Moiseesri Aaroonta pueya shuriucuaaji quiaquee Pueyaso secojoja suhuortujinia. Nojoriiri tii jacamatuquiaari jiyocuaari. Pueyaso shacantuuca cumaacaari nojoriicua muetaree jiyacari. ⁷Pueyasoori jiyacari naa Moisees sequeree:

⁸—Quia nataca quia riri quiarijia. Quia tarajanu Aaroon cuaara quia naacuura puetunu nio pueyajanaa nia rerejotenura. Naa nia miiniu nuhuajitij, quiocua puetunu pueya niquiarajanaa cuno saajia sequere cuaara mohuaca shooteera. Quiocua cuaara niquishurri-riaj, mohuacaari saajiajiniji jaatenutan-ia pueya ratusocoriquiano, juyaca ratusocoriquianojaajanio.

⁹Moiseesri Pueyaso cojee tacoji maano nataca riri. Naa miiriiri taa Pueyaso sequequiaari nojuacuajani.

¹⁰Moiseesri tarajanu Aaroonta puetunu pueyajanaa rerejotequiaari cuno saajia tacoji. Moiseesri jiyacari naa pueya sequereequij:

—Nia tojitiare tojitiaashijiacanaa. ¿Canaateeri nio saajiajiniji pojuarataniya mohuaca nia ratusocoriquianoni?

¹¹Moiseesri naa na sequenuta na natacata pacutejoree cuno saajia piquiniu. Queraatia mohuacaari jiyacari pacaretaquee. Puetunu pueyajanaari jiyacari mohuaca raruuree, nojori juyacajaajanio. ¹²Saniniuujia, Pueyasoori jiyacari naa Moisees Aaron sequeree:

—Janiyacuajaari nia sequereeni, cuno saajia nia sequere mohuaca cuaara

pojuartaara pueya niquiara nojori maniniuhuaqueetanura janiya. Niaari jaarajaaja saaja cucua tiyuaquirijuhua. Niaari naacua cuno pueyataja tiuquitiaquiriquiano niaarano cua niquitiosano jiyajiniajuhuaj.

¹³Meriba cuaritita

jiyaniquishaaquiaariiruno cuno cuari saajiajiniji pojuaratano mohuacani. Tiicuaajari Israel pueya riushujiutiaja Pueyaso, na jiyamuetusacari. Pueyasoori saaja na cumaacata na miishano cuno pueya niishitiquiaari nojuajaari tojetaa-rucuaajanaa miiniu maniniu.

Aaroon shaajesacari

²²Na nuhuaji, puetunu Israel pueyaja-naari Cades cariquia jiyajiniji quiojoquiaari Hor jiyaniishano tuhuana-nuucua. ²³Tari nojori quishacari jiyareta taucuaca Edom jiya namiquiuiquimia, Pueyasoori jiyacari naa Moises Aaroon sequeeree:

²⁴—Aaroonri tari shaajenutaniya.

Nojuajaari Israel pueyara cua niquitiosano jiyajinia tiuquiyaquiniutianiya. Janiyari naa miyani, cuno Meriba cuarijinia nia ruuretanuucua cua sequesano niajaniya. ²⁵Quiajaniya saniniuujia Moisesnaa, Aaroon quia jiyataare neyanu Eleazartaja Hor tuhuananujiniji. ²⁶Quiocua cuno tuhuananujiniji nia quishacari, pueyacuara secojona na quiniuucua, na cushishano toque jocojore. Quiocua saniniuujia neyanu Eleazar cushitirinioj. Aarooncuajaari na nuhuaji saniniuujia tiijia shaajenutaniyacuaja.

²⁷Moisesri jiyacari naa miiriquij taa Pueyaso sequequiaari nojuacuajani. Jiyacaritij, nojoriiri puetunu Israel pueya niquiarajanaa tacataquiaari cuno Hor tuhuananuucua. ²⁸Tiijia nojori quishacari, Moisesri jiyacari Aaroon toque jocojoree. Saniniuujia Eleazar na

cushitiriiri. Tiijiani, cuno tuhuananujiniji, tee nojori quiriqiaacuajanij, Aaroonri tiijia shaajequiaari. Naacuatej, saa Moisesjaari Eleazarta rosetaquiaari-hua cuno tuhuananujiniji. ²⁹Puetunu Israel pueyajanaa jaara niishiquiaari Aaroon tari nimishiquii, nojoriiri niquiriyatu raca na nujuquequiaari.

Broncejiniji Moises shipinishacari soconu

21 ⁴Na nuhuaji, Israel pueyari nojori quishaqui Hor tuhuana-nujiniji quiojoquiaari. Nojoriiri jiyacari tamo naatunacu caminia jiquioocua quiojoquiaari pananu muetasamajiria. Janiya camarucutatureejaaraari maja Edom jiyacuma na niyacutatunura. Naa pueyaracaanu na rucuanetunuucuatej, pueyari socua juaaquiocua. ⁵Nojoriiri jiyacari sacuaraatia rimiaaqueturee Pueyasooocua Moisescurajaajanio. Naa sequestureeri:

—¿Niaateeri Egipto jiyajiniji canaa mashiquinio naa nio cariquia jiyajinia canaa nia cusojuanuunuratej? Majaari ratusocoriquiano mohuaca quiniu, miasocoriquiano casaajaajanio. Canaa tari nio manaa seque jirii jiyanoahuani.

⁶Pueyasoori nojoriicua jiyaroquiaari queraatia mirijianu cuno pueya na sojonura. Queraatia Israel pueyari naacua soconu sajiyashi cusuutaquiaaritij. ⁷Nojoriiri jiyacari Moisesua quiojoquiaari. Naa na sequestureeri:

—iCanaari seetanujuanaa sesa miiriucuaani sacuaraatia canaa rimiaaquenuucua Pueyasooocua, quiocuarajuhua! iCanaacuara quiarijia Pueyaso quia masere, nojuaja cuaara nio sacocua shaajaara canacuaji!

Moisesri jiyacari Pueyaso maseree Israel pueyacuara puetunu nojorijanaa

na jiyanooniuria. ⁸Pueyasoori jiyacari naa Moisees sequereequij:

—Broncejiniji quia jeecare juhua nojori sojojua soconu niquishanojua. Quiocua na nuhuaji macaacua na nujuaretarohuanof. Naacuatej, soconu jaara nojorijinijinio sajiri, nojori cuaara macaacua quia nujuaretasano soconu niquiriia. Nojori jaara naa miiri, majaari soconu saashi nojori cusunutunu quiniutianiya.

⁹Moiseesri jiyacari broncejiniji juhua soconu niquishano jeecaquiaari. Macaacua na nujuaretareeri. Naacuatej, pueya jaara soconu satequiaari, ritia jeecasano soconu niquitiuquiaariiri. Majaari naacua soconu saashi na shaajetanu quiquiaari.

Israel pueya shocotasacari Amorreocuaca camarnu Sehon

²¹Israel pueyari nojorijinijinio tama narta pueyajaaja jiyaramiquirii Amorreocuaca camarnu Sehon jiyanihanocua. Naa na rupaa jiyarotureeri: ²²—Canaa quia shocotereja quia jiyacuma. Majaari canaa rapijionu quiniutianiya nia cuhuariquiacajinia nia nataacuaca. Majaari canaa cooni quiniutianiya nia cuhuariquiacajinia nia jiitiasano uvajuhuj. Majaari canaa raruunu quiniutianiya nia cuariyajiniji nia mohuacajuhuj. Canaacujaari maninia quiojoriquiano saaja quia nuu puereetunuhooco canaa niyacutasacari nia jiyacumani.

²³Sehonorri saa Israel pueya rejeterreejaa maja nojori shoconura na jiyacuma. Saaja puetunu na pueyajanaa rerejotereeri. Na jiyataquee Israel pueyata na naacuneetoonura cartiquia jiyajiniaari. Jaara tiuquijio-seequiaari Jahaza jiyanihanano tiacajinia, cuno Amorreocuacaari Israel pueyata miaquetoojoree. ²⁴Israel pueyari maja na cohuanashitiatunu quiquiaari nojori paraa.

Naacuatej, nojoriiri saa nojori paraa Amorreocuaca shocotatureejaa saniya. Israel pueyari naacua cuno taucuaca jiya jiyatequiaari nojoririatej. Puetunu Arnoon moojinijijanaa, Jordaan moo jiquio Jaboc moocua tohuateemaari. Cuno jiyacuajaari Amoonita taucuaca jiya namiqui puetuyajanaa. Cuno taucuaca jiyacuajaari jiyaconaja sohuacaraca quiquiaari na tiacaca shocua na jiya namiquiiumia. ³¹Israel pueyari naacua nojori paraa Amorreocuaca jiya camaruhuaa quiquiaari

Israel pueya shocotasacari Basaan tiaca camarnu Og na pueyataja

³³Naa Israel pueya miiniu nuhuajitij, nojoriiri Basaan tiacajiniara riujiuquiaariuhua. Og saniniuujia, Basaan tiacajiniji camarnuni, nojuajaari na pueyata Israel pueya miaquejonuucua niquiaari Edrei jiyanihanano tiacajinia. ³⁴Pueyasoori jiyacari naa Moisees sequereequij: —Tuma na puererej. Janiyacuajaari puetunu nojorijianaa quia shocotaniniutianiyan. Nojori jiyari niaaranojuhuj. Quiocua naa nojori miirijuhuj taa quia miiriucaa Hesboon tiacajinia quijia Amorreocuaca camarnu Sehoncuani.

³⁵Israel pueyari taucuaca camarnu Og motuquiaari, necohajuhuj, puetunu na soldadohuajaajanio. Israel pueyari maja quenaaja na curotunu quiquiaari niquiriyatu tahue. Naacuatej nojoriiri puetunu cuno tahue jiyajanaa jiyatetuquiaari nojoriria.

Madiaan camarnu Balac jiiquiootesacari shimiacu Balaam

22 ¹Israel pueyari na qutiushaquiji quiojoquiaari. Moab jiya jamatujinia na qutiujiaara na suhuorotaqueya nujuatejotaseerihuj. Cunoori Jordaan moojiniji pananu

muetasamajiria quiriquiase, jiyareta Jericoo tiaca taquijiria.

²Zipor niyanu Balacjanaari niquiquiaari taa Israel pueya miiriucuaa taucuaca Amorreoacuacuaani.

Nojuajaari Moab jiya camarnu quijia.

³Naajuhuj, narta Moab jiyajiniinio taucuacaari jiyanhua pueretuquiaari jiyanhua queraraqui Israel pueya quiniuucua. ⁴Naacuatej, Moab jiyajiniinio taucuacaari Madaian jiyajiniinio narta taucuaca jiyaniijianucua sequequiaari naatej:

—Cuno pueyari pa jiya riutiocojosee pocuajijia. Pa jiya tucutanutaniya camaruuniu socuaari naatej taa juunu puecojoquiaa jiyasocua miaquejonu cuhuariquiajiniacuani.

Jiyacaritij, Balac jiyanishanoori Moab jiya camarnu quiriquiase. ⁵Naacuatej, Balacri Beor niyanu Balaamcua na rupaa jiyaroquiaari. Balaamri jiyacari Petor tiacajinia quijia, Eufrate moo casaqueej Amav jiyajinia. Balacri nio na rupaa jiyaroquiaari Balaamcua na pueyata. Naa Balaam sequequiaariiri:

—Quiaj, Egipto jiyajiniinio quiano pueyari puetunu nio canaa jiyajinijanaa paaquejerecuaa. Naacuatej, nojoriiri quiarijia niya tari canaa tiaca taquijiria quishii. ⁶Miji ritia quia niyare Balaamnaa. Cuno pojori quiria quia shimiojoquee. Nojori cutaraari socua cumaacaraca canaajiniji. Quiaa jaara naa shimiojoquee quiria nojoritij, cua naata jiyoteeri naacua nojori mashiquiniu canaa jiyajiniji cutaratej. Janiyacuajaari seetanujuaanaa niishiyani, quiaa jaara maninia rupaajinia casaa sequere, quiaa jaara shimiojorejuhuaj, puetunu cunojuanaari tohuatequiaa.

⁷Naacuatej, Moab, Madaian jiyajiniinio jiyaniijianucuaari na cumaneeca patootaquiaari Balaam na niquitiotusocoriquiano jaara Israel

pueya shimiojore nojoriria. Cuno pojori jaara tiuquiiioseequiaari Balaamcua, nojoriiri Balac sequesano caminiujuquiaari Balaamra. ⁸Balaamri nojori sequeeree:

—Nia maquerejaara niya nio niucua. Janiyacua tariqui nia sequeseequiani janiyatee niaata quianutaniyani maja soj. Coteenu Israel pueya Pueyaso shanacureera cucua, taa na sequenutaniya janiyani.

Moab jiyajiniinio jiyaniijianucuaari tijia maquetiuyaree cuno niucua Balaam tiajiniani. ⁹Cuno niucujani, Pueyasoori Balaamcua muetaquiaari. Naa na nequesotareeri:

—¿Balaamnaa, canaputeja nio pueyani niya quia tiajinia quiyani?

¹⁰Balaamri Pueyaso riucaaree:

—Moab jiyajiniinio, Zipor niyanu camarnu Balaccuaa cua numootenuucua niya cucua na pueya jiyaroreeno.

¹¹Egipto jiyajiniji mashinio queraraqui pueyana tiuquiriucuaa. Cuno pojoriniaari quiarijia puetunu nojori jiyajinijanaa niyaquejerucuaa. Balacri paniya ritia nocua cua quianura quiarijia, na miaquejosocoriquiano nera cuno pueya cua shimiojonura. Jaara na naata quiri cuno pueya miaquejonu, nojuajaari na jiyajiniji cuno pueya taanuunu paniya.

¹²Pueyasoori saaja naa Balaam sequeerequij:

—Cua tojiri. Maja cuno pojoritia quianu cuno pueya sesacanura. Cuno pueya quiaa na sesacanura masuushiyani, cuno pueyacuajaari tariucua maninia rupaajinia cua sequesano pueya.

¹³Jaara juhuaquequiaari, Balaamri na riniuucua nocua Balac jiyaramiquishano jiyaniijianucua sequequiaari naatej:

—Nia jiyacua nia riujiuurihua. Maja Pueyaso paniniu cua quianura niaatani.

¹⁴Moab jiyajiniinio jiyaniijianucuaari riujiuuquiaariuhua nojori camarnu Balaccua. Naa na sequetusuhuari:

—Maja Balaam niniu paniniu quiriucuaa canaatani, na niquiniuucua quiajaniya.

¹⁵Balacri socua jiyaramiquiquiaari jiyaniijianucua na jiyatesano na pueya. Coteenu na jiyaramiquishanojinijini, nojoriiri socua queraraqui na pueya quiriquiaa, socua tojishano na pueyajuhua. ¹⁸Balaamcua nojori tiuquishacari, Balaamri saaja naa cuno pueya sequequiaritij:

—Balac jaara cua niquitiore na tia mishaja oro platajaajanio, naajaa majaari na panishano cua miiniu quiniutianiya. Na panishano jaara quiri secaja, queraatia soj, majaari cua Pueyaso sequesano cua shocotenu quiniutianiya Balac panishano cua miiniuria. ¹⁹Naajaa, niyaja nia maquesee. Israel pueya Pueyaso shanacureera cucua, casaa na sequenu-taniya quiarijia janiyanij.

²⁰Pueyasoori cuno niucua Balaamcua muetaquiaari. Naa na sequereeri:

—Cuno pueya jaara quia riniuucua niya tiuquirii, nojoritia quia quiaarequi. Quiocua saa cua sequesanojua miishii.

Balaam burro niquishacari Pueyaso

²¹Balaamri socua naacua sanequiaaritij. Na cajijiara na burro nijinia casaa moroquiaariiri. Cuno Moab jiyajinijinio jiyaniijianucua quiaqueeri. ²²Balaamri na burro nijinia cajiriquiaa na quiasacari. Querajaa na jiyaraajiaari nata quiariquiaajuhua.

Pueyasoori juaariquiaacujua Balaam tojiniuucua nocua nijiono pueya, nocua nijiono pueyata na quianuucujuhua. Naacuatej, Pueyasoori nocuaji cutequiaari na nuujinia, na tenujunura juucua. ²³Burro jaara niquiquiaari Pueyaso na nijiniaquetucujua mueruu muetuyano nuu jiuujajinia, nuujiniji tunequeeri. Cuhuariquiaaco tamoco na

camaru neretariquiaari. Balaamri jiyacari na burro pirii, nuujiniara burro tacatenuhuara. ²⁴Na nuhuaji, Pueyasoori nuu secanesaqui nujuaquiaari nojoriicuaji. Nuuri saatiuniu quiriquia-se; uva cuhuariquiaa tajiniaaco neteriquiaseeri. Naacuatej, miaquetajara, muenecarajuhua, cuhuariquiaa casacacaaari saitia matacojosano quiriquias. ²⁵Burro jaara Pueyaso niquiquiaari, saitia nuu casaca matacaacuara pojoqueeri. Jiyacari na camaru Balaam cashacu tanureeri. Balaamri jiyacari na seru camiriohua piquiniuhua. ²⁶Pueyasoori jiyacari nojoriicuaji cutesee socua na tajoji jiyanojua nuu secanejesaqui. Majaari quenaaja tii pueyano naata quijia narta pueyanota niyonejetoonu. ²⁷Naacuatej, burro jaara Pueyaso niquiquiaari, jiyocua jacamaquee nocuajiiri. Balaamri naacua juaariquij. Macata piquirii na seruuri. ²⁸Pueyasoori jiyacari burro pohuateree. Naacuatej, burroori naa na camaru Balaam sequereequij:

—¿Casaa cua miirii quiajaniyanij? Quiaari tari cua pacutejoree piquiniu jiuujianaraca.

²⁹Balaamri na seru riucuaaree:

—Quiaacuarateja cua rerequetereejaj. Cushiiishi niariquia cua juaashiquiajinianij, janiya maara quiarijiaja quia morinij.

³⁰Burroori saaja naa riucuaaree Balaam:

—Janiyacujaaari noo quia seruni, pueyaracaanu na nijinia quia cajishanotej. Quiaacujaaari maninia niishiya, majaari tari naa cua miiniu quijia quiajaniyatej taa quiarijia cua miiriicujani.

Balaamri na seru riucuaareecujua:

—Seetanujuaanaa naacuaaquinatejaj.

³¹Pueyasoori jiyacari Balaam namijia tojeteree nojuaja na niquiniuria.

Pueyasoori jiyacari nuujinia nujuari-quiaa. Na nijiniaquetucua mueruu cacariquiaari. Balaam niquishacari Pueyaso, jiyocuaa jacamareeri; na jiniji rupueteree jiyocuaari. ³²Pueyasoori jiyacari naa Balaam nequesotareequij:

—¿Casaara jiuujianaraca tari quia pacutejoree quia seru piquiniunij? Janiyajanaacuaajaari quiocua roseyareeni cua cosenura quiajaniya maja quia shoconura. Janiyari juayani quia quianuucua terara quia masuusaarucuaacujani. ³³Quia serucuaajaari cua niquiriini. Nojuajaari naacua jiuujianaraca cua pacutejoree niyonenu juucua. Quia burro juhua cua niyonujureeni, janiya maara tari quia moreni. Maja cutaraari quia seru cua monu, quia nuhuaji na quiniuria cutara.

³⁴Balaamri naa Pueyaso riucuaaree:

—Janiyaqui seetanujuanaa sesa miiriini. Janiyatuma taa niishirini quiaari nuujinia ritiariquiaa cucuaji maja cua shoconura. Jaara quiaari quiri sesa naa cua quianuratej, riujuuuriohuaraquij.

³⁵Pueyasoori saa na riucuaareejaa:

—Naajaa quia quiaare cuno pueyata. Majaari nio niyajetanu cutara. Quiocua saa cua tosano quiajaniyaja pocuasee.

Naacuatej, Balaamri nocua Balac jiyaramiquishano jiyaniijianucuaa quiaquiaari.

Balac quiasacari Balaam naacunuucua

³⁶Balac jaara tosaquiaari Balaam tari nocua quenaacoriqiuano, Balacri na naacunuucua quiaquiaari narta Moab pueya tiacajinia. Cuno tiacaari Arnoon moo shuriquiumia. Cunoori jiyareta nojori jiya namiquiuiquiumia tamasa taucuaca jiyata. Na naacuneetosacari, Balacri naa sequeeree Balaamtej:

³⁷—Jiyanohua cua tacaaniucua, janiyari quiocua pacutejorucuaa cua

pueya jiyaramiquiniuni. ¿Casaara quia tarijiorucuaa saajaarani? ¿Quiaateeri jiyaniyaruhua majaari cua naata maninia casaa miiniu quiarani?

⁴¹Tariqui saniniuujia, Balacri Balaam tacataquiaari Bamot-baal tuhuananuucua. Balaamri tiji niquishii saa Israel pueya suhuortucua casacaja.

23 ¹Balaamri jiyacari naa Balac sequeereequij:

—Seya cua catijajara niya quiria quia juhuacujure siete juhuacutucua. Quiocua catijasocoriquiano siete juunu macujuashiya puecoorejuhuaj, siete borreecojaajanio.

²Balacri naa miirii taa Balaam sequequiaari nojuacuajani. Puetunu cuno siete juhuacutucujinijajanaani, Balacri jiyacari Balaamta mariyataa catijiaree niquiriyatu juunu macujuashi, niquiriyatu borreecojaajanio.

³Naa seya na catijiatunu nuhuajitij, Balaamri Balac sequeeree:

—Niyaja cua sashiri juhuacutucua shuriucuan. Rupaquijia tuhuananuucua tacaanijia. Tii Pueyaso shanacunutaniyanijia, cucua muetanutaniyatejanojoni. Janiyacua saniniuujia na sequesano quia numooterenijia.

Saaja maninia rupaajinia Balac sequesacari Israel pueya

Balaamri cariquia tuhuananuucua tacaquee. ⁴Pueyasoori tii nocua muetaquiaari. Balaamri naa na sequeeree:

—Janiyari quiarano cua catijajara siete juhuacutucua juhuacujutereeni. Janiyari tari tii catijiaree niquiriyatu juununi, niquiriyatu borreeconio, puetunu cuno siete juhuacutucujinijajanaa.

⁵Pueyasoori jiyacari Balaam niishitiojoree casaa na sequenutaniyani jaara

Israel pueya shimiojotesaare juucua.
Pueyasoori Balaam sequereee:

—Balaccua quia riujiyarohua.

Quiocua naa na sequesuhuanotej, taa
cua niishitiojoree quiajaniyacujani.

⁶Balaamri riujiyarohua. Balac riuriata-
suhua seya cateyano juhuacutucua
shuriucua nujuaanoori. Na shuriucua
nujuaturiquiaajaarihuaj puetunu narta
Moab taucuaa jiyaniijianucujanaa.
⁷Balaamri jiyacari naa coteeree Pueyaso
tosano caminiujiuniuriatej. Naa
sequereeri:

“Cua quiquiojiniji, pananu muetasa-
maji Aram tuhuananuhajiniji, Moab
pueya camarnu Balacri cua
jiiquiooterucuaani. Naa cua sequeru-
cuari: ‘iMiji quiaj, quiria quia
shimiojoquee nio Israel pueyani!
Nojoricuajaari nojori supuetana Jacob
niquiohuacuajinio caneno pueya. Naa
quia shimiojosano cuaara quiria tojeera
cua miaquejosocoriquiano.’ ⁸iMoseeca,
taa cua sesacaacuaa Pueyaso sesacasoo
pueyani! ¿Janiyatucua casaara naa
taraatia cuno pueya miishaanura nojori
panitiareni? ¿Pueyasotee naa taraatia
cuno pueya miishaanura nojori
panitiaacuaa? ⁹Janiyajanaacuaajaari nio
saajia tuhuananujiniji nojori niquiyani.
Nojori shootiaacuajania nio jocoma
tuhuananujiniji. Cuno pueyari jiyareta
tama nojorijiaaja; tamasacata cojitiyori.
Nojoriiri tojeeca pueya tamaquicua
quijiaca pueyapuejiniji. ¹⁰Tojetaarucua-
janaa jijanohua queraraquiiri; majaari
naacua na naata serojosaanunioj.
¿Canatuma nojori serojorecuani, na
niishishaanura taa pueyateja nojorini?
iJaniya maara shuquiriaatia quirini
janiya jaara shaajeyariquiani juhua
cuno sesa miyaquijiaca! iJaniya maara
timiyareni janiya jaara maninia
miishaare juhua nojorijiani cua
shaajesacari!”

¹¹Balacri jiyacari Balaam juaarii. Naa
na sequereeri:

—¿Casaara naa quia miyani? Janiyari
niyara quia jiiquiooterucuaani cua
paraa quia shimiojonura quiria. Quiaari
saa nojori maniniuhuaqueetareejaa.

¹²Balaamri Balac riuucaree:

—Janiyacuaajaari naacua maatia tari
coteenu quia sequerucuaani, janiyari
saaja coojiajinia Pueyaso niishitishano
sequenutaniyani.

¹³Balacri saaja jiyacari Balaam
shiniujiurii. Naa na sequereeri:

—Miji, niiquiji pa pacutaare tamaqui.
Quiaari tiji saaja cuno pueya
suhuortucua shocua niquiniutianiya,
maja suhuortucujanaa. Quiocua tiji
cuno pojori shimiojosee quiria cutara.

¹⁴Balacri Balaam pacutaquiaari Sofim
jiyanishano cuhuariquiajinia. Cunoori
Pisgaa tuhuananu quiajaacua quiriquia-
se. Nojuajaari tii juhuacujusee socua
siete juhuacutucujiniajanaanj, tii catijaree
niquiriyatu juunu macujuashiiri,
niquiriyatu borreecojaajanio. ¹⁵Balaam-
ri naa tii sequequiaari Balactej:

—Seya catesacarijia niyaja cua sashiri
juhuacutucua shuriucuaani. Pueyasota
naacuneetoonuucua quiaaniajia.

¹⁶Pueyasoori Balaamcua muetaquiaa-
ri. Jiyacari Balaam rootareeri maatucua
taa na sequesano caminiujiuri Balac
tojishocoriquianonij. Pueyasoori naa
Balaam sequereejuhuj:

—Balaccua quia riujiyarohua. Quiocua
na niquiara caminiujiushuhua taa cua
niishitiojoree quiajaniyacujani.

¹⁷Balaam tiuquishacariuhua, Balac
riuriasuhua seya cateyano juhuacutu-
cua shuriucua nujuaanoori narta Moab
jiyaniijianucua. Balacri Balaam
nequesotaree:

—¿Taa Pueyaso sequereee
quiajaniyani?

¹⁸Balaamri jiyacari naa caminiujiurii Pueyaso sequesantej. “Zipor niyanu Balacnaa, nio quia tojiri maninia. ¹⁹Tuma jiyaniy Pueyaso juhua pueyano-ju. Nojuajaari tojetaarucujanaa sapojiyaquijia. Nojuajaari na niishiriojoso jataaquijiajuhuaj. Pueyaso jaara sequere casaa na miiniutianiyani, cunocujaari tohuateriquiano. Naajuhuj, Pueyaso jaara casaa sequere seetanujanaa, nojuajaari na sequesano miiija. ²⁰Janiyacujaari seeratasaaareni maninia rupaajinia cua sequenura cuno pueya. ¿Pueyaso jaara naa maninia miyacuaa cuno pueyatej, janiyatucua saniniuuja casaara nojori sesacarenijia? ²¹Supuetana Jacob niquiohua maanuucujainio caneno Israel pueyani, nojoriiri sapojiyashijiaca, sesa miyaquijiacajaariuhuj. Nojori Pueyaso-cujaari nojori cojiquiaa pueyaracaanu. Na pueyari naacua na jianiquiquiaa nojori camarnutatej. ²²Pueyasojuanaanij, nojuacujaari nojori jaatiaquiaari Egipto jiyajiniji. Nojuajaari nojori cumueeca juhua buufalo tuhuajaaja nocuaji na paraa na jiriaquetaja. ²³Naa na paraa miiniu paniniu sesa Jacob niquiohuacuajainio caneno pueyani, puetunu cunojuanaari najuhuanaj. Israel pueyarani, nojori paraa shimiacaari najuhuanaj. Naacuatej, janiyari quiarijia Israel pueya sequeyani: ‘Nia niishiriojore taa casaa nocuaji jiuujatesano na cumaaca-ta Pueyaso miijiocanu niaaranij.’” ²⁵Balacri socua naa Balaam sequeree: —Majacuaja quia naata cua paraa shimiojonu quiria. Maja tari cua paniniu socua nojori quia maniniuhuaqueetanura maninia rupaajinia. ²⁶Balaamri naa na riuacuree: —¿Majateeri tari cua sequenu quiriucuaa maatia quiajaniyacuja, janiyari saaja Pueyaso tosano sequenutianiyani?

²⁷Balacri jiyacari naa na sequeree: —Miji, niiquiji pa pacutaareeruhuj. Pueyaso jiyoteeri maja na juaaniu quiniutianiya quiaa jaara cuniquiji shimiojosee cutara cuno Israel pueya. ²⁸Balacri jiyacari Balaam jiyataaree Peor tuhuananu jiyaniishano quiajaacua tiji niquishaariquiaari puetunu cuno cariquia jiya jamatujanaa. ²⁹Balaamri tari tii nojori quishacari naa sequeree Balactej: —Quiria niya quia juhuacujure siete juhuacutucua. Quiocua cua catijiasocoriquiano siete juunu macujuashi puecoorejuhuj, siete borrecojaajanio. ³⁰Balacri naa miiquiaari taa Balaam sequequiaari nojuacuajani. Naacuatej, Balaamri siete juunu macujuashi catijiaree, siete borrecojaajanio. **24** ¹Balaamcuajaari niishiriquiaa, Pueyasoori naa na Israel pueya na maniniuhuaqueejotanuucua na miiijosano timitiariquiaa. Naacuatej, Balaamri maja tari na quianu quiquiaari Pueyasota na naacuneetoonuucua Pueyaso sequenura nojuaja na maniniuhuaqueetasocoriquiano Balac niquiara. Balaamri na nujaasaquijijia jiyacari cariquia jiyajiniara jiriquioree. ²Supuetana Israel doce niquiohuacuajainio caneno pueya suhuortucua niquiriiri. Nojori doce maapue suhuortucuaari maninia niartasano quiriquiaa taa nojori rootasaaquiaricujaniy. Pueyaso Sohuanuuri jiyacari Balaam jiuujajinia tiuquiquiaari Pueyaso panishano na caminiujiuniuria Balac niquiara. ³Balaamri naacua Pueyaso sequenu panishano coteeree caminiujiuniu: “Nioori Beor niyanu Balaam sequesano. Janiyari coojiajinia pueyano niishiriojosano niishijiani. Janiyari niquishoo casaa niquijia maatian. ⁴Pueyaso jaara cua tojetere juhua cua maquenujiniaja na niquitiniuria casaa, janiyari naacua pueya niishishoo casaa

niishiquiaa socuani. Naajuhuj, Pueyasoori pueyarano na sequenu panishano cua toquiaa. Janiyari cua maquenujinia casaa niquitishaaquiaajaniuhuj. Puetunu cunajuanaari puetunu cumaacaracajanaa quijiajuhanaja Pueyaso niquitishano janiya. ⁵iJacob niquiohuacuajinio caneno pueyanaa, casaa maniniu nia suhuortucua! iShanohua niquishanoori nia suhuortucua cari, Israelcuajinio caneno pueyanaa! ⁶Nia suhuortucuaari shanohua shuquijiaja juhua sacramueenacaja. Niaari naacua juhua moo shuriucua na shuucucarano natoosano nataacuacaja. Niaari juhua Pueyaso aloe jyanishano nataacuacajuhuj. iNiaari Pueyasora juhua moo shuriucua nujuaja suruhuatujua! ⁷Israel pueyari queraatia mohuaca jiitariquiano na raruusocoriquiano. Queraatia mohuaca jiitariquianojaariuhuj nojori nataacuaca na shiijotajara. Nojori camamuuri na cumaaca tojtioriquiano taucuaa Amalec camamu Agag. Na sequesanoori puetunu jiyacajinijanaa tojishaariquiano. ⁸Pueyasoori na pueya jaatiano Egipto jiyajiniji, nojuajaari naacua na pueyacuaji tacuquiaa. Nojuajaari tojetaarucujanaa nujuatasoo juhua nacajaaraca buufaloja. Israel pueyari na paraa puecoriquiano na jiyacajiniji. Nojoriiri na paraa nucuhua shuniitariquiano. Na paraacua tohuariquitiijioriquiano na cashijaariuhuj. ⁹Israel pueya jaara na samaatenura pojocore, nojoriiri juhua juurunu sareja. Na pueresaanuucua, majaari quenaaja niquiriyatu pueyano quiniu na niucujariquiano. iManinia rupaajinia na maniniuhuaqueetajacaari maninia miishaa-riquiano! iNa shimiojona saniniujia, nojoriiri shimiojosaariquianojuhuj!”

Balaam caminiujiushacari Pueyaso sequenu panishano

¹⁰Naa Balac tojishacari Balaam maniniuhuaqueenutej, Balaam juaarii

jiyanohuari. Na juaashiquia na piquiniutia naa Balaam sequereeri:

—Janiyari quia jiiquiooterucuaani quiria quia shimiojonura cua paraa. Quiaari saa maninia rupaajinijaja na maniniuhuaqueetaree. Quiaari tari jiuujianraca pacutejoree naa maninia rupaajinia na maniniuhuaqueetanutej. ¹¹iQuia tiajinia quia riujiuuriohua juhuari! Janiyari juucua quia panitiarucuaa nareja niquitiojonu queraatia casaa maniniuni quiaa jaara cua paraa shimiojore quiria. Pueyaso-cujaari saa quia tenujureejaa, maja naa quia miiniuria.

¹²Balaamri saa na riucaareejaa:

—Janiyacujaari cucua quia jiyarami-quishano pueya sequerucuaa maatiani:

¹³Camarnu Balac jaara na puereetuua tia miishiniri orota, platata na niquitio-socoriquiano janiya, majaari Pueyaso sequesano cua shocotenu quiniutianiya. Naacuatej, tama cua panishacarijiaaja majaari cua naata maninia miiniu, sesa soj. Janiyari naacua saaja pueyarano cua caminiujiushocoriquiano Pueyaso sequesano sequenutaniyani. ¹⁴Maninia-cuja, janiyacujaari cua jiyajinia quiohuani. Cua quiaaquishacarijia, janiyari coteenu quia sequenutaniyani taa nio Israel pueya miiniutianiya quia jiitiasano pueya na nuhuajinij.

¹⁵Beor niyanu Balaamri jiyacari naa Pueyaso sequesano caminiujiurii Balacra: “Nioori cua sequesano. Janiyari niquishoo casaa maatia niquijiani. Janiyari noojiajinia pueya niishiriojosa-no niishijiani. ¹⁶Janiya jaara saseyani janiyari niquishoo casaa niquiquiaa socua maatiani. Janiyari jiyocuaaanu quijia Pueyaso niishishano niishiquiaajaniuhuj. Cumaacaraca quijiajuhanaja Pueyasoori na sequenu panishano na rupaa cua caminiujiutiquiaa. Cua saseenujinia

casaa cua niquitiquiaaariuhuaj.
¹⁷Janiyari nio nuhuaj pa quishacariria niquiya tarini. Janiyari juhuacarijia tari shootiaa tucuacaanu pa tacojini. Supuetana Jacob niquiohuacuajinio supueno pueyano niquiyanijia. Nojuajaari na Israel pueya camarnu quiriquireano. Nojuajaari Moab taucuaca camarucua shaajariquiano tojetaarucua-janaa. Nojori supuetana Setcuajinio caneno taucuaca shaajariquiano tojetaarucua-janaa. ¹⁸Na quiquiora na paraa jiya Edom jaariutiariquianojaariuhuaj. Nojuajaari naacua Seir jiya tiuquitiariquiano. Cuno taucuacacuaajaari na paraa. Israel pueya shocojotanuucua na paraani, nocuajiiri tojinuushaariquiano. Nojoriiri naa nocua jiuujiatesano casaa miijioriquiano. ¹⁹Jacob niquiohuacuajinion, shocotajaari supenutaniya. Nojuajaari tiacajinia cureno pueconutaniya tojetaarucua-janaa.”

²⁵Naa na caminiujiuniu nuhuajitij, Balaamri na tiajinia riujiyarohua. Balacri quiaarohuajuhuaj.

**Israel pueya jatasacari jeecojosano
 Baalcuara na jacamatunura**

25 ¹Israel pueya jaara Sitim jiyanishanojinia quitishiiquiaari, canuuri Pueyaso nojori pueretasano taatujuri Moabita rucuajeejoquiaari saaja. ²Taatujuriiri naacua Israel pueya masuunujujua, canuu cojiniuria nojori jeecojosano na pueyasora seya nojori puecoosacari. Naa Israel pueya cojiniuucua taatujuritij, nojoriiri jeecojosano casaacuara taatujuri puecootesano juyaca miaquenuujua. Nojoriiri cuno jeecojosano casaacuara jacamatujua cuno casaa nojori timitianura juhua Pueyasoja. ³Israel pueyari naa tama

sacuraatia jiitiquioquiaarijiaaja cuno Baal-peorcuara na jacamatunura. Pueyasoori naacua Israel pueya juaatiaja jiyanohte. ⁴Pueyasoori naacua naa Moisees sequereeqij:

—Puetunu Israel pueya jiyaniijianu-cuajanaa quia rerejotere. Canaputeja sacuraatia miiriucuaani, nojori cuara puecoosaaria puetunu pueya niquiarajanaa. Israel pueya cua juaatianucua quenaaja naacua shinitiaretej.

⁵Moiseesri jiyacari naacua puetunu Israel doce maanujinijinio nequesoreenaajanaa seerataree. Naa nojori sequereeri:

—Niajaniya nia maanu nequesoreenaani, puetunu niajanijajanaa cuara tama nia maanujinijinio pueyajaaja puecoora teyonu pojoritiucuaja Baal-peorcuara jacamatujucara jatarucua juhua Pueyasooaruajani.

⁶Jiyacaritij, Moisees niquiaraja, puetunu narta Israel pueya niquiarajajuhuaj, niquiriyatu Israel pueyanoori saaja jiyacari na suhuortujiniara canujuteyarohua Madiaanjiniijinio taatu. Narta pueyari jiyacari nujuqueturiquiaacuaa Pueyaso secojojua suhuortu tohteateyaji.

⁷Fineesri Eleazar niyanu. Eleazarri supuetana Aaron niyanu. Finees jaara narta pueyano niquiquiaari naa cuno taatu canujuteyanotej, narta pueya rerejosaquiji tohuataqueeri. Nojuajaari narta pueyano nuhuajitiamaa na cashana. ⁸Tariucua nitiootaca na sohuacamara najuhuamacurtiasee narta pueyano cuno taatutajaari. Naa cuno pueyano mosaanuucua na taatutajatej, quenaaja naacua pueyajequiaariiri jiyacari pueyapue puequetasano cuno ritia pacujua cusonu. ⁹Naajaa, veinticuatro mil pueyari jiyacari tari puequetaquiaari cuno ritia pacujua cusonu.

¹⁰Naacuatej, Pueyasoori jiyacari naa Moisees sequereeqij:

¹¹—Fineescujaari maninia miirii naa na puecoonuucua cuno sacuaraatia miijiacatej. Cua juaaquiaca shiniajareeri. Naatej taa cua juaariquiaacuaani, nojuajaari jiyanohua juaariquiaajuhua nio Israel pueya miiniuucua sacuaraatia. Janiyari naacua cua juaaquiaca rejetereni maja cua puecoonura puetunu nojorijianaa. ¹²Naarate, Finees quiria quia numotere. Janiyari pueyaracaanu maninia na miijioriquianoni. ¹³Naa maninia na miiniuucua quiriатеj, janiyari naacua quiarijia nojuajanaa jiyateya pueyacuara secojona na quiniuria pueyaracaanurani. Nocujinio caneno pueyari naa pueyaracaanu pueyacuara secojonaa quiriquianojuhuaj. Fineescujaari cua seera juaariquiaa. Naacuatej nojuajaari cua jiyanootiriucuaa sesa miijiaca narta Israel pueya.

¹⁶Pueyasoori jiyacari Moisees sequereeqij:

¹⁷—Nio Madaian taucuaca nia tiuquitiare. Puetunu nojorijianaa nia miaquejore. ¹⁸Nojoriiri sacuaraatia nia miitiriucuaa na sapojonuta, Baal-peorcuara nia jacamatunura juhua cucuaraja. Naajuhua, nojoriiri sesa nia miitiriucuaa cuno Cozbi jiyanishano taatuta, noo Madianita camarnu niyatutej. Cuno taatucujaari najuhuamacurtiasano pueya puequetasacari ritia pacujua cusonu. Janiyari naa pueya cusojuanuunoni, casaara nojori jataquiaari Baal-peorcuara jacamatujuacaracuajani.

**Puetunu Israel pueya canuu
sesacajanaa naajiotasacari**

26 ¹Naa pueya cusonuutunu nuhuaji cuno ritia pacujua cusonutej, Pueyasoori naa sequequiaari Moiseestej, pueyacuara secojona Aaron niyanu Eleazarjaajanio:

²—Puetunu Israel doce maanujinijinio caneno saa canuu sesacaja nia naajiotare. Cuno pueya cuaara quiiria tariucua veinte marijia shocojoteno. Puetunu nojorijianaa cuaara quiiria miaquejonu niishijiaca. ⁶⁴Puetunu cuno Israel pueyapuejiniajanaani, majaari quenaaja niquiriyatu noo pueyapue quiniu quiriquiaa tari, teyonu pojori sesaca Moisees Aaron naajiotaquiaari cariquia Sinai jiyajiniacuajani. ⁶⁵Noo pojori, tariucua rishimiaca mashinio Egiptojinijitij, Pueyasojuaanaacuajaari juhuacarijia maatia nojori numootequiaari, puetunu nojorijianaari cariquia jiyajinia cusonuuriquiano quiriquiaa. Cusonuuno pueyajinijinioni, saaja Calebri cureequiaari. Nojuajaari Jefone jiyanishano niyanu quijia. Cureequiaarijaariuhua Josuee. Nojuajaari Nun jiyanishano niyanu quijia.

**Pueyasorano catijasocoriquiano
puetunu juucajanaa**

28 ¹Pueyasoori naa Moisees sequequiaari:

²—Quiarta Israel pueya quia numootere. Nojoririano cua miijosano nojori niishiriojonuucua nojori queranacusacari, nojori cuaara pueyaracaanu quiria catijiatuura pan; cuaara quiriano socua nojori niquitiojotusano casaa catijiatuurajuhua. Maja nia niyajetenu. Naa nojori catijiatuano casaari shanohua jaanujua quiriquiano quiriano. ³Pueya quia sequerejuhuaj, nioori quiriano nojori catijasocoriquiano puetunu juucajanaa; majaari quenaaja na jaartenu: Querajaa borreeco macujuashi, niquiriyatu marijia shocoteno. Cuno borreecohua cuaara quiiria tojetaarucujanaa borreecohua maniniu. ⁴Cuno querajaa borreconi, niquiriyatu cuaara catijiasaaria tariquii-

cuaji, tamonu quera pananu tiuquishacari.

Seetanujuanaa sequesano cuaara tohuateshiyara miiniu

30 ¹Moiseesri cuno doce Israelcuajinio caneno pueya jiyaniijianucua sequequiaari naatej: ²—Niquiriyatu niajanijiniinio jaara seetanujuanaa sequere casaa na miiniutianiya narta pueyanoranj, cuaara seetanujuanaa na sequesano tohuateera, cuaara puetunu na sequesanojanaa miirijahuaj.

Israel pueya miaquejosacari Madaaan taucuaca

31 ¹Pueyasoori Moiseescua muetaquiaari. Naa na sequereeri: ²—Quiara quiarta Israel pueya quia namitiri cuno Madaaan taucuaca. Naa quia miiniu nuhuajitij, quiaari shaajenu-taniya.

³Moiseesri naacua jiyacari pueya sequereequij:

—Pueyanaa, noojiaqueya niajanijiniinio cuaara na cashi poyara Madaaan taucuaca nia miaquejonura Pueyasora. Cuno taucuaca nia tiuquitiare, nojori nia naminiuria sacuaraatia nojori miitiniucua pajaniya Pueyasora.

⁴Naacuatej, puetunu pa doce Israel pueya maanujiniiniojuanaani, tama nojori jiyaniijianucuaajaaja cuaara mil pueya jiyaramiquirria pa paraa miaquejonuucua.

⁵Jiyacartij, puetunu doce Israel pueya maanujiniiniojuanaani, saquiriojosaa-reeri mil pueya puetunu nojorijiniiniojuanaa. Naacuatej, puetunujuanaari doce mil soldadohua maanu quiriquiaa miaquetojonuucua quiojoriquianoni. Tariucua pueca cashiriacaari quiriquiaa.

⁶Cuno Madaaan taucuaca

miaquejonuucua nojori quianurani, Moiseesri puetunu cuno soldadohuajanaa seerataree Finees. Nio Fineescuaajaari pueyacuara secojona Eleazar niyanu. Fineesri jiyacari Pueyasorano jiyatesano casami pooquiaari, miaquetojonuucua nojori quiojosacari. Jonenenuusano trompeta jyanishano pooquiaarijaariuhuj, na paraa miaquejonuucua narta pueya na cocuatajara. ⁷Nojoriiri jiyacari nojori paraa Madaaan taucuaca miaquejoree. Puetunu na puecatureejanaari. Nojoriiri naa nojori paraa shooriiquij. Pueyascuajaari naa sequeno Moiseesteej. ⁸Jiyacari puecooturee Evi, Requiem, Zur, Hur, Reba jyanishanojaajanio. Puetunu nio cinco taucuacajanaari Madaaan tiacaca camarucua quijia. Jiyacari moturee Beor niyanu cuno shimiacu Balaam jyanishanojaariuhuj. ⁹Israel pueyari Madaaan jiyajiniinio taatujuri jyanootiurii nojoriria, necohua macucuaajaajanio. Puetunu nojori paraa seya jyanootiurii nojorirajaariuhuj. Cunoori juyaca quiriquiaa; jyanohua panishano casamijaajanio.

¹⁴Miaquetojonuucua mil soldadohua maapue puerojono camarucua, cien soldadohua maapue puerojono camarucujahuaj, nojoriiri na paraa miaquejonujini tiuquiriquiohua jiyacari. Moiseesri jiyacari nojori juarii. ¹⁵Naa nojori sequereeri:

—¿Casaara cuno taatujuri nia curoree puecoonuurini? ¹⁶Balaamcuajaari cuno taatujuri niishitiojoquiaari Israel pueya nojori miitiniuria sesa. Naacuatej, cuno taatujuriiri Israel pueya shiniujuquiaari maja Pueyaso nojori tojiniuria. Na sapojonuta Israel pueya masuunujutujuaari nojori pueyasorano na jiyatetusano Baal-peorcuara na jacamatunura juhua Pueyasocuaraja. Pueyasoori naacua na Israel pueya

saniitiono, ritia pacujua cusonu nojori cusonuutanura. ¹⁷Quiarijianij, puetunu naatujoori canuujuanaa nia puecoore. Maajipohua nia puecoorejuhuaj noo pojori tariucua pacaroosanotej.

¹⁸Saniniuuja, pacaroosoojua niyacoojori nia curore cutara nia niquiocohuarano.

**Jiuujiaashano pueya tiacacara
cuaara saquiriojosaaria**

35 ⁹Pueyasoori jiyacari Moisees sequere:

¹⁰—Naa quiria quia numootere puetunu cua Israel pueyajanaa: Niaa jaara Jordaan moo niuuri Canaan jiyajinia nia tiuquiniuria, niocua niishijiaa quiri. ¹¹Na camaruhua nia miaquejonu nuhuaji, niocua tiacaca saquiriojore teyonu tiacacateja coonu quijara maniniani. Noo pueyano quijara narta pueyano monatej na niishiriojiyaquishacari na monu. ¹²Narta pueyano mona cuaara quiiria cuno tiacajinia maja juurunu tarajanu naminiuria nojuaja saniniuuja. Cuno pueyano cuaara moyaquishaaria juhuanojuaja narta pueya tacoji na nequesoreyaquishacarijia taa miyanoteja narta pueyano moreeni. Jaara coteenu nequesoreesaare, naacua shusha saniitioshiya cutaraari.

**Narta pueyano mona cuaara
mosaariajuhuaj**

³⁰Pueyamaanu pueya jaara pueyano mosaanuucua rauatatare cutara, cuno

cutaraari seetanjujanaa. Saniniuuja, niquiriyatu pueyano jaara saquiriojotare pueyano mosaanuucua, jiyanoocuaari maja tiuushano cutara. Naacuatej, pueyanotucua casaara najuhuaana mosaareni.

³¹Teyano pueyanoteja narta pueyano na monuucua tari sequesaree mosaanuni, nojuaja cuaara mosaaria. Mosocoriquiano jaara na cumaneeca niquitionu paniri juucua maja na mosaanura, majaari na cumaneeca masenu cutara. ³²Naacuatej, niaatucua casaara najuhuaana shanacure narta pueyano mona rishiniuria cuno tiacajiniani, na nuhuaji jaara na cumaneeca niquitiore na jiyanooshaanura. Cunoori maja maninia. Naajaa, mona na naata riujiuuniuhua na tiacajiniuhua pueyacuara secojonaa camarnu shaajenu nuhuaji. ³³Naa niarta pueya nia pueconuniquitij, niaari tama nia quijiarano jiyajaaja sesoyacujua. Narta pueyano monaari maja jiyanooshano. Nojuaja cuaara mosaaria narta pueyano na monuucua. ³⁴Naacuatej, maja tama nia quijiarano jiyajaaja sesonu naa niarta pueyano nia monuucuatej. Janiyajanaa nia Camarnuniqui, janiyajanaari niaata quiriqianoni, cua Israel pueyanaa.

36 ¹³Pueyasoori puetunu niojuanaa na jiyaraajia Moisees caminiujiutiaquiaari puetunu na Israel pueyarajanaa. Cunoori quiquiaari nojori quishacari Moab jiya jamatujinia Jordaan moo shuriuquiumia, Jericoo tiaca taquijiria.